

VENDREDI SAINT

« Victoire, tu régneras, O Croix tu nous sauveras ».

Bampangi batondama,

Beto ikele kusungimina bubu mampasi ya Mfumu na beto Yezu-Kristu. Beto imene kwisa na kutala Yezu na zulu ya kulunsi, na luse na Yandi ya nkenda ye ya lutondo.

Mono ke zola nde na kitanu yai ya Santu, beto kupindula meso na beto na kutala kulunsi ya Yezu.

Bampangi,

Kitanu yai ya Santu, ke songa na beto Nzambi ya ikele kutonda beto nkatu ndilu. Yandi imene pesa beto Mwana na Yandi Umosi; Yandi me zola nde Yandi kugulusa bantu ye ntoto mvimba. Yandi me tonda beto tii kuna nsuka, tii kuna lufwa na zulu ya Kulunsi. Ikele diswekamu yai ya beto ke sungimina bubu. Lutondo ya imene monika na meso, lutondo ya imene nunga lufwa ti disumu. Ya kieleka, na nkokila yai, beto ke sungimina lunungu ya lutondo ya ikele kumonika na meso na beto na zulu ya kulunsi.

Bampangi,

Kristu me tonda beto, tii na kundima lufwa na zulu ya kulunsi. Na mampasi na Yandi, ikele lutondo ya Tata ya ke monikila beto.

Ikele na kulunsi ya Yezu me kituka kisina ya lugulusu ya ntoto mvimba. C'est sur la croix, qu'il règne sur l'univers.

Na kitanu yai ya Santu, beto kupindula meso na beto na kutala kulunsi ya Yezu ye beto kusamba na nsi ntima.

Bampangi bana ya Nzambi,

Kristu imene kwisa kusonga beto mpila ya mpa ya kuzinga ; luzingu yonso fwete luta na kulunsi, na mampasi, na ntwala ya kumona kiese ya kieleka. Yandi mosi mwana ya Nzambi imene kuluta na nzila ya kulunsi ye ya mampasi. Na kumona nkembo, nge fwete luta ntete na kulunsi. Awa na ntoto yai, luzingu ya kukonda mpasi, ke vandaka ve ; kana nge landa luzingu ya kukonda mpasi, nge ata zinga mbote ve.

Luzingu yonso, ikele ti kulunsi na yo ; ye konso muntu fwete baka kulunsi na yandi.

Beto ikele bakristu sambu Mfumu na beto kufwaka na zulu ya kulunsi. Beto vila ve nde Nzambi na beto, ikele Nzambi ya kulunsi, Nzambi ya mampasi. Yo yai ya beto ikele zingila bilumbu yai tatu : na kukuma na Pake, beto imene yantika na kiya ya santu, ye beto ke luta na kitanu ya santu, kilimbu ya mpasi.

Mono ke zola kubambula beno mbundu, bampangi na mono. Beno keba na kulanda malongi yankaka, ya Kristu me longwa ve ye me zingila mpi ve. Sambu bubu yai, mono ikele kuwa bamitubi yankaka (boke tuba nde bo ikele bamitubi ya Yezu) ikele kulonga Kristu nkatu Nkulunsi, nkatu mpasi. Beno keba. Ye mono ke zola nde, bibuti kukeba bana mbote, na kulanda ve bilanda-landa. Ikele ti malongi ya nkaka ya ata bebisa luzingu ya bana na beno. La vie facile n'existe pas. C'est au prix des efforts, au prix du travail, qu'on parvient à la réussite.

Beno zaba nde luzingu ya kukonda mpasi ke futaka ve ye yo mpi ikele ve. Na kukituka muntu ya kieleka, nge fwete mona mpasi, nge fwete tula kingolo-ngolo, nge fwete nwana bitumba ya kieleka (une vraie bataille - la vie est un combat). Muntu kukusa beno ve ; ntete-ntete beno baleke : beno keba.

Kulunsi, mampasi, ikele yo yina ke songa nde ya kieleka nge ikele mukristu. Ye mbala mingi, kana mukristu na beto imene kubasika na Dibundu na beto, kima ya ntete ya bo ke songa yandi na kukatula ikele kulunsi. Yandi mpi ke lemfuka, sambu na kuzinga luzingu ya kukonda mpasi. Mpangi, pana zaba nde luzingu na nge, imene kubeba! Nge me vila nzila na bikwenda-kwenda, na bisosa-sosa!

Kana nge mpangi, nge ke sosa luzingu ya kiese, ya kimvwama, ya mbongo nkatu kumonila yo mpasi, nge ata zinga mingi ve. Beto kwenda ntama ve, beto tala na lweka na beto ye mpi na nziunga na beto, ikwa imene kubeba ye kubebisa luzingu na bo ? Ikwa ikele na kulokuta matiti na balabala ? Ikwa me kuma mvindu ? Ikwa me yungana ? Beno mosi ke zaba bikuma ya bo me kuma mutindu yina : ikele na kusosa luzingu ya ntinu, nkatu kumona mpasi, nkatu kusosa mambote yina yonso na Kristu, ya ikele kimvwama, mayele, ngangu ye luzingu ya kieleka ; mambote ya fwete luta na kulunsi.

Bampangi, kubika fioti beto ata fukimina kulunsi ya Yezu. Na nima, beto ata tambika na Ntotila ya ntoto ti ya zulu bisambu kumi. Ikele na bangogo kumi ya Nzambi kugangaka bima yonso; ye na bisambu yai kumi ya beto ketambika na Yandi, beto ke lomba nde Yandi kupesa na ntoto luse ya mpa; Yandi kutula ngemba na ntoto, mpamba ve bitumba me luta mingi; Yandi kupesa luzingu na bifulu yonso ye na konso muntu; beto ke dodokila Yandi, na kufutumuna beto kumosi ti Kristu.

Bampangi, beto kusamba Mfumu, nde na bisambu ya Mwense Maria, Mama ya Yezu, yandi kulombila beto dienga ya kundima mampasi ya luzingu bonso nzila ya ata nata beto na lugulusu.

Idiofa, le 25 mars 2016

+ José MOKO EKANGA

Pisekopoya Idiofa